

## БАТАЛАР

А, Құдайым ондасын,  
Оңдағанның белгісі –  
Мың саулығың қоздасын.  
Сексен інген боталап,  
Сегіз келіп қомдасын.  
Тіленшінің биесін берсін,  
Үйсін, Қоңырат түйесін  
берсін,  
Өткен әруақтарға дұғасы  
тие берсін!

\* \* \*

Құдайым, жарылқасын,  
Төрт түлігінді сай қылсын.  
Мал-басыңа сәулет берсін,  
Кең пейіл берсін.  
Құрбандығың қабыл болсын.  
Тілеген тілегінді берсін.

\* \* \*

Асың-асың, асыңа,  
Береке берсін басыңа.  
Бөденедей жорғалап,  
Қырғауылдай қорғалап,  
Қыдыр келсін қасыңа.  
Сенен байлық өтпесін,  
Тәңір берген несібең,  
Тепкілесек кетпесін.  
Желіңнің екі шетіне  
Тай шаптырса жетпесін.  
Кешке келіп жамырасқан,  
Шуылдасып маңырасқан  
Қошақанның енесі –  
Саулық бассын үйінді.

Бақайлары сыртылдап,  
Мүйіздері жылтылдап,  
Бұзаулардың енесі –  
Маң-маң басқан, маң басқан,  
Шудаларын шаң басқан,  
Артқы өркешін ком басқан,  
Ботақанның енесі –  
Інген бассын үйінді,  
Шіңгір-шіңгір кісінескен,  
Жал-құйрығын тістескен  
Құлыншақтың енесі –  
Бие бассын үйінді.

\* \* \*

«Төңірекке қарасаң, түнерген бұлттар әлі бар... Түбі қандай болады деп қобалжымалық... Дауылды жауын ету қолымыздан келмесе де, үйімізді үй етіп, шашылмай қалудың қамын желік... Дүниенің төріне ұмтылғандар төрден орын алып жатыр. Ұмтылмағандар есікте қалып жатыр... Қалмайық десек, қарап жатпалық... Көп ісіне көп болып жабылайық... Қолымнан не келеді деп қорынбайық. Ұлтына қызмет етуге ниет болса, жұмыс табылады. Көп жұмыстың ауыры да, жеңілі де болады. Қазақтың бітіп, тынып тұрған нәрсесі жоқ. Әркім әлінен келер жұмысын алсын. Жадымызда болсын, аз нәрсе көпке сеп болмақшы. Сәл демеу зорға сүйеу болады. Ұлы іс ұсақтан ұлғаяды... Ұлт үшін деген күштің ұлғаюына үлес қосу қазақ баласына міндет».

«Елін қорғайтын ер болайық,  
Ерін қолдайтын ел болайық!».

«Қай ісіміздің де Құдай сәтін салғай! «Әумин» деп қол жайып, «Әуп» деп күш қосып, «Алла!» – деп іске кіріселік» Әумин!